

四庫全書

集部

欽定四庫全書

兩宋名賢小集卷三百六十八

宋 陳思 編

元 陳世隆 補

雪磯叢稿三

謝楊孟溪縣丞惠以章墨

白首侯芭蜀江邊
曾向君家傳太玄
射熊草賦留殘墨
相應當日還渠得
飄零瀟洒幾世孫
解得膠法春玄雲

物理往來元莫測後世子雲還舊壁君家所有更贈君
君還贈我何殷勤感君殷勤復三歎努力西窗磨鐵硯
太玄艱深吾不為願寫誠齋易傳探玄機

佳人兩章寄許東溪

衡之山鬱蒼蒼我有佳人在水之陽木難為珮兮雲錦
為裳愛而不見兮我心憂傷安得為鷓鴣凌風置君旁
衡之山鬱蒼蒼其一衡之江清且漪我有佳人在江之湄
朝食落牆兮夕饌江蘼欲往從之兮我馬虺隤安得為

琴高沿波與君隨衡之江清且漪

其二

登濂溪太極樓

岑樓跨層崖灌木翳顏沼曠哉宇宙心况茲展遐眺前
哲日以遠川麓被文藻芳甸馥荃蘅江渚雜鳧鳥亭亭
沼中蓮冉冉庭下草扣寂參太極撫化領衆妙俗薄神
理乖力柔聖迹杳英英考亭翁反心會天奧萬里粲良
言一誠貫元造勗哉登樓人畢景盡此道深根復深根
篤行以為寶

醉中偶成

醉敲茶臼嘯秋烟
苦欠高陽買酒錢
擬入亂山食柏葉
石林閒對麝香眠

送友人遊昭川呈陳謙之僉判

閔仙去補荔支譜
梅谷歸呈飛鴛篇
惟有瓜坡共君在
馬蹄何苦又昭川

道鄉牽損袞龍衣
謫墮天涯咏楚辭
莫放蹇驢遊別處
拾青閣下有殘碑

鵬運堂前話別愁
落牆三度楚江秋
近懷莫向元龍道
問舍求田是缺頭

夏日偶書

螺贏銜蟲入破窗
枕書一垛竹方牀
家童偶見草頭字
誤認離騷是藥方

秋日行村路

兒童籬落帶斜陽
豆莢薑芽社內香
一路稻花誰是主
紅蜻蜓伴綠螳螂

新淦偶成

飛飛絲鳳挂梅梢
猶記來時雪擁袍
今日歸舟新淦路
街頭稚子賣櫻桃

贈吳季詩

燕子樓頭春色深
曾騎驕馬擲黃金
如今世事漫頭雪
破屋孤燈忍凍吟

演教寺弔樓居朱漕

羅帶江頭蛻繡衣
人歸香草謝家池
祇今玉樹埋何處

惆悵僧房認得詩

穿塚難酹地下知
逢人多說項斯詩
今朝痛洒西州泪
萬里梅花欲放時

延真道院

滄流翠竹接仙扃
靈菜丹虬供上真
擬就元翁分半榻
閒聽秋雨守庚申

訪趙愚齋不遇謁者云
抵晚方歸因成一絕奉寄
雪片梅花滿斫池
芙蓉幕裏客歸遲
今朝解了公家事

儘聽轅門報酉時

到衡岳呈弟山長

間依禹柏繫征驄
猿鳥應猶怪賤踪
正擬開雲訪韓愈
可能避雨識茅容
朱陵洞裏秋呼鶴
紫蓋峰前曉聽鐘
欲踏青霞尋勝趣
倦遊應許借吟筇

許介之館僕于東溪臨發贈別

洗耳泉頭漱晚涼
西風衣袂水花香
酒邊豪氣橫荆楚
燈下清談雜晉唐
天地每窮真俊杰
山林偏有好文章

試提孤劍同君舞後夜聞鷄月滿牀

下第歸後李白輝李景魏索近詩

吟徧吳頭楚尾春多慙才客問征塵振衣天目尋黃獨
濯足湘江咏白蘋宋五已慚稱進士陳三何用作詩人
錦囊元屬君家有今買漁經理釣綸

題李湛溪詩集後

楚砧岷葛飽清遊金節銀菟照幾州詩句多如姚少監
行程還似杜參謀黃陵夜誦虞妃泣白帝春吟杜宇愁

擬問湛溪何處是夢隨闕國弄漁舟

寄姚雪蓬使君

湘鱗六六寄相思
疎柳新蟬想別時
今夜各聽三楚雁
秋風又老一年詩
梅花且補離騷闕
蕙苴應為史筆知
剪竹疑峰新製笛
待衝霜月訪桓伊

謁山齋先生易尚書

淳熙人物到嘉熙
聽說山齋亦白髭
文字盡傳融水後
精神如戰辟雖時
靈椿終不孚朝菌
著草難堪養壽龜

細撚梅花看總義只應姬老是相知

送桂帥鍾尚書超召

老依牙纛撚吟髭又折梅花話別思五嶺不遮鸞鳳詔
四方俱誦鱗魴詩人才晉魏凋零後國事江淮倥傯時
賴有老臣經濟在快呼桂醕餞篙師

題鍾尚書北征詩藁

野雉江鷗滿故都秋風禾黍撚吟鬚六千里外驅旃旆
五十篇中見版圖金鉉尚期扶日御玉衡終令正天衢

書生亦有中原志那得君王丈二笏

呈廣西張提刑

陸續城邊按部歸梅花隨處撲征騑溪山有助吟題徧
獄市無冤訟牒稀竹屋呼猿眠碎月莎庭引鶴步斜暉
莫嫌瘴霧侵湘客滿路風霜冷裊衣

罪言

愁殺瀟濱蟻虱臣亂山斜照獨含情人才不似深衣古
國勢如何楮幣輕石燕未蘓湘國旱木牛那濟蜀州兵

幸無杜老流離苦切莫吟詩到北征

送程營道官滿赴闕

高旻振興籟蒼雁鳴芳洲傾城餞茂宰鄉耄羅藻舟茂
宰蘊淵道厥源溯伊流宇眈振仁策範俗惇聖猷夷心
灼理要政簡吏統周芳風被儒肄惠澤淪農疇魯封有
馴翟張庭無訟牛慨茲戒徂兩離衷鬱綢繆贈我茂叔
蓮紉君晏子裘慶霄眎鳳躍神囿瞻麟遊世道日以隘
民瘼誰克瘳厲志抗遐棄吹萬溥九州揆予忝皇鑒敷

丈免征愁行行重行行夷庚無駐舟

次韻李監丞月夕閔雨

種陸旱欲槁蒺藜秋向榮哲匠軫民瘵慨此夜魄明葺
收正秋斂肥遺何縱橫仰霄眎蟾曜聆埴佇鸛鳴彼美
玩華光芳樽酌麴生崇榭歌窈窕秀質羅輜輶節序孰
不歡宅生念匪輕同袍正焦灼對酒何忍傾恤喜限惛
智同茲感陰晴淅淅山雲起策策林飈驚企彼天瓢潤
弭此農稊聲崇情發翰墨賞心謝籌觥溥澤乃夙念穹

爵豈所營榮賤有異分感茲反岩畊

次韻李監丞城西紀游

叫舜問寥濶咏漣滌塵囂駕言城西游慨彼往昔遙儀
鳳不可呼駕鵞浴清瀟懷或光風杳蕙若吹涼飈蒼梧
隴雲愁廬阜太缺彫豈無人希周亦有文規姚佔畢末

學陋俗薄神理銷沿流浮伊洛沂源窺羲堯執中與太
極萬古魁瞻杓察微篤強力賢聖諒匪遼舜宮翳灌木
漣塾棲叢茗觀乎紀游作悟彼進學條蘭卮娛才彥豈

謂磊塊澆得深清賞
愜理勝英藻超揆子
果何為農野
勸耕穠景迫昧見道
曷奉德化昭

雨夜讀陸放翁集

爐冷重吹火山房
夜黯然濕薪添
焚蕪苦茗滯芋煎
燈暗瀟江雨詩吟
望澤烟老仙何處
去搔首弔塵編

送黃天河

天河那可到山頂
翠參差邨屋煎黃
蠟官爐焙荔支地
蠻遊宦少縣小迂
賓遲鼻祖曾吟處
荒苔想滿碑

呈趙叔愚司理

澗戶垂楊句江湖半世看不應求五嶺却自建孤壇浙
社朋遊盡缺詩氣象寒今朝流水調只向子期彈

閒居自遣

雨積桑樞長昔邪誰能載酒訪揚家漢廷用少臣今老
魯俗皆冠我獨髡憂國苦無蠲忿草看書喜對決明花
衰顏懶作江湖夢擬斲三椹養鬢華

許由溪上小屠蕪紅樹蒼山對一臞白髮功名惟劍在

青山活計并鐘無，誰言荆楚多奇士。
却笑乾坤一腐儒，桐帽貂冠俱有分。
寄言兒輩莫揶揄。

寄樓居朱漕

住近江心古寺邊，幅巾應伴浙僧閒。
官銜自管金陵觀，冠缺多依鴈蕩山。
出處皆留青史看，功名且逐白雲還。
殷勤為祝樓居月，好照橫舟送碧灣。

史主簿以授菴習稿見示，敬題其後，并寄張宗瑞、姜夔、荒塚、白蘋、深鷺、鶯、無聲、結綠、沈擬、向鄱陽、尋後社。

只招張叟聽君吟

吟了南樓到庫樓塞雲邊月困雕鏤只今南北無詩禁
曾有新編過韃不

次韻熊雲瀑秋夜見寄

叫徹蒼梧望八荒暮雲秋客各淒涼此情未許旁人會
愁絕中庭月一方

兩宋名賢小集卷三百六十八

欽定四庫全書

兩宋名賢小集卷三百六十九

宋 陳 思 編

元 陳世隆 補

雪磯叢稿四

呈姚雪篷使君

祝融應自勝崆峒且讀通書辨聖功事可語人甘受謗
詩能名世不嫌窮春邊采藥收湘蒨月下調弦送楚鴻

賴有行人碑尚在棠陰依舊戀東風

雪篷見示送趙東崑詩

皇華歌徹酒杯忙澤畔騷翁送范滂
琴帶衡雲弦索潤馬食湘芷轡絲香
山中狸豹隨吟旆部內豺狼入按章
却笑詩寒吟骨聳愁看酬唱挾風霜

書蕭千岳集

向來楊陸共崢嶸吟到亭邊趣轉精
古似洞庭張雅樂嚴如即墨斂殘兵
茵陳終不肥方朔芣苢何堪病冉耕

細讀殘編搔白首未應造物忌詩名

滕王閣下賦

越舸蜀艇亂相俛風飽千帆帶雨開閣上鳴鸞今已往
江頭飛鷺只堪哀柳汀絮滿河豚賤桃塢花殘石首來
應接溪山吾不暇自憐白髮欠詩才

宿金灘

瀧吏崖翁是賞音江流泯泯對秋吟天蝦撲火檣帆晚
水狗捎魚島嶼深千里庭闈雲滿眼十年湖海雁驚心

今宵客枕清如許穩讀西山夜氣箴

寄許介之

贏得詩名遍九州酒徒棋畔半公侯
離騷甘隱魚鱗屋樂府多傳鸛鵲樓
醉葉幾窠藏菊徑蠹荷三畝護漁舟
中原應有樓蘭國空鎖吳鉤到白頭

聞邊報寄姚雪蓬

淮烽蜀燧照邊隅白髮憂時我腐儒
楚客汀洲塞杜若齊王沮澤索柴胡
耽吟自愛南游好久謫曾謀北事無

擬對祝融捫蝨語何時重將使君鬚

寄戴石屏

曾到元郎吟處吟雪篷烟艇久相尋鳳鳴道國空詩句
雁到衡峯只信音拾椽祠邊寒聽雨紉蘭院裏夜分衾
塞驢倘遂黃花約鴉背敲烟共掘參

戊戌冬僕客桂林雪中趙叔愚司理書張司業逢
賈島絕句為寄今冬對雪感而有作

朔風桂水浸瓊沙曾共騷翁理釣槎對客又吟瑞木

缺

論詩還憶款冬花，饑能驅我瓶儲罄。老不饒人鏡影華，
擬喚扁舟尋剡叟。嶺梅瀟菊各天涯。

寄仙巢先生鍾尚書

吹香亭上送飛鴻，且把行藏寄蜀桐。老境只須尋遠志，
世途還要避沙蟲。公行天地初何憾，道在丘園固未窮。
曾是轅門投卷客，應憐聽雪卧隆窮。

寄蕭太山兄弟

梅花好處共心期，曾擷天葩寄夢思。兄弟自為千古計，

江湖方誦二蕭詩，貪泉定喜逢廉吏。倭國何須拜老師。

蕭穎士事

賸擬尋君攀桂樹，路途誰肯借驢騎。

送丁少卿自桂帥移鎮西蜀

瓊海收邊玉帳閒，又移齋艦泝浯灣。三邊形勢全憑蜀，
四路封疆半是山。魏將舊聞侵劍閣，漢兵今欲卷函關。
細傾瑞霧論西事，想在元戎指畫間。

嘗家洲

竹塢松灣，履痕斷碑無首野苔昏。江山應識前賢事。

賢哲今存幾世孫
皇霧海霞留古意
春猿秋鶴冷騷魂
何人會得登臨意
閒嚼梅花伴酒樽

次韻李監丞同劉玉淵遊七泉

世變如流水前喆嗟逝川
良牧隆化本訪古漫叟泉念
茲名泉意感彼末路偏淵竇
與嵌臼杖屨聊回旋不識
漫叟心曷誦漫叟篇惻念軫
蒼氓溥澤同一天蟻聚與
羔跪命義當亦堅回邪乃敗
德毋以已欲專夸士五鼎
辱穹爵或自鑄臨流嘆澆風
薄言傾酒船浸泉旌我志

凍泉存舊傳，漉漉孝。汙直銘石昭，萬年無缺。感發人黜，
彼敲墨，擅歲月亦云久。古跡埋塵烟，泉根石已泐。泉上
樹欲仙，森戟呼虎士。誰能聽潺湲，理義著古今。貴賤俱
荒阡，今公七泉游。陵谷尚未遷，勵俗振古道。及茲誦惡
圓，劉侯同襟期。賡倡揮彩椽，漫叟或有知。騎鯨躍層淵，
彼哉賊君父。圓曲工求權，厲民恣屠斫。巧宦勤攀緣，安
得激七泉。布作化雨宣。

送綱齋李監丞赴湖南提舉

吏統久已紊使選非易為蝎虺何蓐蓐鴻雁何累累持
節豈不多曠職苟所私緬懷紫陽翁昔使東浙湄陳臬
糾官邪揚仁蘓民疲茲道有後先哲儒昭令規絢齋寄
瀟牧德懋灼帝知勵廉肅察冢反稅驩鄉耆所學蘊淵
道寬嚴權理宜茲總全楚境歌此皇華詩位穹民言邈
壤廣吏蝨滋問俗職所重簡僚乃政基視聽貴遠周細
微在可遺攬轡戒前路豈為好爵縻揆予忝英盼懷德
念別離別離夫何念康濟乃所期懿茲遠大業肇此咨

度時勗哉振英采慰我湘民思

秋夜感懷

溽露沾灌莽華月流高昊吟笑嘉此夜撫化悲蕭辰蕭
辰何所悲遊子多苦辛道窮年力謝業遙壯志湮玄鬢
日以變豐景豈遂淪堪輿一大宅義娥為旅人卉木互
榮落蛩蟀何吟呻氣隨稚髦變理勝卹喜均反性樂天
爵測化葆道真撫卷慨往哲芳猷藐難親

術士醴陵丁夢榮將之春陵有贈

看盡槐花買卜人
宸樽且認舊碑文
只今世上無清惠
却恐元郎解笑君

綠水池邊舊釣磯
何時歸去濯征衣
千年城郭應無恙
祇怕風塵老令威

送歐陽平仲起鬱林教官

快把詩書洗瘴茅
雕題墨齒盡同胞
天涯那得隨衿佩
試借叔堂講義鈔

古來節婦比忠臣
悵明珠一窖塵
千古綱常君記取

題詩煩問墜樓人

萍鄉和王堯章韻

征衲無人補舊綿
蕭條客枕楚萍邊
撥殘石炭西窗冷
却憶山家楮拙烟

慈氏閣

崢嶸梵閣碍銀潢
且對畦衣問馬王
落日斷霞連楚粵
缺鐘壞像雜梁唐
英豪已往雄圖歇
棟宇猶存古意荒
惆悵石湖題柱在
倚欄無句獨淒涼

雉山寺宋永初中有僧西顛誦法華經於此白雉
聽之而化至唐黃梅五祖弟子喜登告祖乞巡禮
五祖應以遇雉即止後至此開山本朝王初寮有

留題

蘇碑蘿石擁嵒局獨倚筇枝問大乘白雉苦無千歲種
有山空識六朝僧詩傳北岳刊新帖禪接西淮冷舊燈
擬鑿冰泓澆凍研禊亭間借法華謄

擬遊長沙至零陵忽動歸興

擬尋禹柏過長沙且泊愚溪問酒家
歲旱何能飛石燕
秋高還看落天蝦
乾坤納納催霜鬢
歧路悠悠又菊花
惆悵草黃騏驎病
歸心依舊繞烟霞

袁家渴泊舟

往事誰能問水濱
停橈仍是薄西暉
樵漁空自存袁姓
鳧雁何應識柳文
釣艇分燈歸客艇
嶺雲拖雨接溪雲
梗櫂蘭芷今何在
空使行人誤舊聞

小巖袁家窠竹居買酒

江遶衡門接旅津
鯉魚風歇水潏潏
湘醑三盞澆吟思
瀟碧千竿對老身
題壁未能行客醉
典琴不用主人貧
隔江誰掉扁舟去
滿載鸕鷀捉錦鱗

餞雲壑唐使君赴邕州

簟筍竹畔擁雙旌
回首江離隔楚汀
曾向前賢參學問
且教遠俗識儀刑
安南兵息烽烟冷
羅殿馬來蠻草青
悵望鈴齋何處是
遙瞻朱雀認詩星

歸侍

石田茅屋野苔春，喜對庭闈話苦辛。
客路本無如意事，瘴鄉惟有蚤回身。
且尋農耒耕湘雨，待看天戈洗戰塵。
門外黃旗邊餉急，可憐杯酒各傷神。

寄吳茂遠

蘓公堤畔繫吟驢，知在垂楊第幾株。
學校文章如畫餅，朝廷官爵似呼盧。
春吟應欠梅花在，時事曾言楮幣無。
惆悵湘湄分袂處，今看細雨長蘼蕪。

送史主簿之鄂就辟

囊中秋卷逼唐賢門外侯芭問太玄才大豈堪栖枳棘
官清應只友蘭荃湘行又泛君山月淮績曾衝赤壁烟
擬借從君新句看試尋黃帽寄綱船

宦途捷徑在三邊且駐吟船贈馬鞭壯士苦無橫槊志
將軍還用撒金錢韃兵猶未回燕鴨蜀耗何應問杜鵑
今日送君無別話看隨卻殺洗狼烟

送邵仄坡試湖南漕舉

槐花匝路促湘行閩賦唐詩舊擅聲有志向曾言國事

論心何止在科名
畢方夜燭杭都火
大角秋纏蜀道兵
莫教腐儒場屋話
琅玕滿腹正須呈

送李公裕遊臨武

嶺梅瀟菊兩關情
歲晚江湖載酒行
客路欲依嚴挺子
瘴鄉已老少游兄
瓦盆且話田家事
肉食誰通鈍漢名
惆悵韓張亭畔路
雪鞭風帽又東征

贈江華熊伯岩

堂萱營柳伴吟哦
黃綬仙翁鬢未皤
對客不矜名第貴

論心唯在簡編多江頭魴鯉香晨膳境內鷗臬冷夜窠
湘國詩盟人寂寞衰頹猶喜識陰何

江華送熊清父遊廣州時予有衡陽之役

邂逅陽華且酒壺海鵬衡雁各征途閒身俱被饑寒役
老境還堪離別無鄉夢定應思款段客吟何用說俶隅
曾從仙叟參玄訣好訪安期采澗蒲

喜李景魏就熊岩伯縣尉招

長歌白石艸廬深今抱園絲就賞音溫飽不為兒輩計

行藏端見古人心
鱸魚堂上春開帳
鸚鵡灘前夜對衾
擬挂奚囊梅下聽
謫仙應共隱仙吟

送友人之辰州覲省

跼鳥巢畔瘴雲低
山徑如梯去馬遲
正則自吟皇樹頌
廣微惟誦白華詩
春風採藥桃花國
落日尋碑蕙蔭祠
覓得丹砂能寄否
溪亭送客鬢毛衰

夢訪劉漫塘魯雪巢二先生

前輩風流歇
江湖欠賞音
向期行古道
誰復識予心
月

浸金壇冷雲歸玉筍深瀟湘風雨夜客夢得相尋

青湘逢廷對人歸因問時事

南客帝鄉歸青袍照綠髭問知當世事解誦聖君詩淮
蜀軍書急襄樊邸報遲空傳廷試策韋布說邊陲

南林寺

律院僧應俗庭荒草木刪無碑堪攷古有客自看山竹
好惟嫌密雲多不自開小溪知最近童浴夜方還

兩宋名賢小集卷三百六十九

欽定四庫全書

兩宋名賢小集卷三百七十

宋 陳思 編

元 陳世隆 補

農歌續集

戴昺字景明號東塾石屏之從孫嘉定己卯登第授
贛州法曹參軍有東塾農歌集

莫悲秋

傷春非貞女悲秋非烈士時運自循環我心如止水剝
固復之機榮乃悴之始未識天地妙胡為浪悲喜鷓蓬
或數仞鵬圖或萬里大小何必齊蒙莊未窮理

次黃叔粲茶隱倡酌之什

美人隱于茶性與茶不異苦澁知餘甘淡薄見真嗜自
隨世俱昏寧墮衆所棄靈雨濕山腴迅雷起龍睡野草
未敢花春芽早呈瑞鬪茗須占一焙火不落二趣深同
誰參雋永時自試葱薑勿容溷瓜廬定非類標名寓玄

思微吟寫清致成我君子交從彼俗定志嚼芳憩泉石
包貢免郵置遼遼玉川翁千載共風味

夏肯甫曉山亭

開櫺納晨光隱几挹寒翠以我胸中真會彼景外意孰
因夜息存孰使晝梏累念慮方清明體認貴切至我我
成九仞進進基一筭勗哉亭中人涵養玉其粹卷書意
何如顏回坐忘地

春日偕兄弟侍屏翁遊晉原分得外字因集句而

成

春雨晴亦佳
適與賞心會
初日照高林
幽泥化輕塹
步屨隨春風
始覺天宇大
牽懷到空山
逍遙白雲外
青松夾路生
童童狀車蓋
清川帶華薄
陰壑生虛籟
性達形迹忘
傲然脫冠帶
薄暮方來歸
月光搖淺瀨

唐李涉有山中五無可奈何詩戲用其體作秋日四章

無奈秋風何
怒號振林木
著我井上桐
一夜失寒綠
莫

作搖落悲妙理在觀復

無奈秋月何鍊魄金氣精炯炯一輪滿天地冰壺清照
我方寸景表裏同光明

無奈秋山何萬疊淺深碧起來樓上看朝爽浮几席稜
稜正自高更養靜壽德

無奈秋水何悠悠蕩輕漿上下天一碧顛倒涵萬象願
從雙白鷗生涯寄浩蕩

青陽梅先舒伯虞為其尊人索靜閒軒詩

人心元至虛天下本無事舉世役于形擾擾誰暫置先
生自超俗涵養老逾粹妙契無名翁深造靜閒味壺中
貯日月宵次納天地婆娑閱四序物物見春意林花高
下紅庭草淺深翠一笑扶瘦筇行吟散微醉

壬子立夏日同郡博士黃次夔遊江東太白釣臺
因成古詩併呈偕行諸友

翰林天酒星謫墮人間世豪氣眇乾坤浪迹寄湖海
峩江祖山片石峙西澁醉狂御風來踞坐高傲睨一絲

聊戲垂意得在魚外青天畫屏句妙越無塵界至今五
百年春虹絢暗彩我來訪遺蹤躡屐捫薜荔錦苔剝冰
霜彷彿題字在屬時春夏交微雨弄輕霽同遊俱嘉朋
笑語各傾蓋雲木團晝陰松風奏天籟勝踐心已愜酣
歌意彌快欲招臺上魂舉爵酌清泚今昔自殊時欣感
諒一契詩成寫蒼壁存否非所記長嘯下歸舟驚湍飛
送棹

梳頭自歎

短髮如冬霜一朝白一朝又如深秋柳槁葉迎風凋白
者不再黑短者不復牢羲娥疾馳驥乾坤虛懸瓢人生
寄其間泛泛波上泡百歲一大夢倏忽已隔宵胡不遑
所造而乃隨滔滔富貴撇眼電榮華過耳颿木散故得
壽龜靈徒自焦甘拙自安吉役智滋勞忉所以柴桑人
不肯折此腰

上立齋先生十首以有官居鼎鼐無地起樓臺為

韻

形弱能使強脈病能使壽醫和肘後方袖手若無有綠
野歸晉公洛社閒迂叟此意誰得知可以久則久

羸牛指為驥鳴臬認為鸞彼欲欺一世自亂耳目官吾
直不能枉吾方竟誰利何妨寄楚澤餐菊紉秋蘭

蔚蔚空明山古號仙人居神秀發虹氣瑞應真璫璵潔
白外難汙堅剛中不枯勿逐鼠璞價韞匱姑藏諸

支厦資寸筵涉江寄孤艇弗顧勝弗勝乃諉幸不幸舜
華朝暮期蒼松歲年迴從渠寶康瓠我自有岑鼎

君子如真金真金剛不改小人如浮雲瞬目多變態隨
世良獨難殉道乃無悔近日崔菊坡堅卧辭鼎鼐

薰蕕不同性涇渭不同趨由來區以別那使強合汙老
聃守道德韓非事刑誅二人共一傳能信千古無

多金建華屋一堂容百客立齋有廳事不覺旋馬窄僻
于蕭相居隘甚晏子宅鬼神瞰高明吉祥上虛白

靈巖一片雲曾為作雨起風吹還故山松筠澹相倚秋
高霜露寒酒熱鱸魚美少寬憂世懷微醉有妙理

否泰闕世運進退非人謀
尼父雖皇皇不為無理留
用則巨川楫舍則野渡舟
行藏兩付之獨倚百尺樓
小草有遠志埋沒同蒿萊
風霜坐相欺冉冉成枯荻
我公下白屋意重黃金臺
儻借伯樂顧未信終駑駘

雜言三首

衆芳以春榮萬葉以秋肅
造物持其權兒戲恣翻覆
亭山上松蕭蕭澗邊竹
超然榮肅中正色閱寒燠

提壺勸我飲布穀催我耕
我酒餅已罄我田草正生
荷

鋤理荒穢及時新雨晴秋來刈吾秫庶得兩遂情

遙翻凌丹霄潛鱗縱深壑天分安所適翔泳同一樂短
吟五七字薄酒三四酌浩氣與春風相從滿寥廓

孤桐行

孤桐結根倚崕石俯瞰清溪照虛碧枝葉扶踈朱夏寒
上有翔鸞舊棲迹風霜冉冉歲月深老柯半朽蒼皮蝕
其中素抱金玉聲以暗投人人不識人不識多苦心樵
夫斤斧莫相尋寧教枯死倒澗壑不從費下求知音

書初考

得考雖多幸無功祇自嫌但求官速蒲不道老同添
拙翔蓬鷄艱辛上竹鮎黃花寒更好三嗅憶陶潛

侍屏翁客遊雪山分得生字

雪峰峰頂寺來此定詩盟山瀑分雲影松風亂雨聲
眼明春樹綠心惺曉鐘清未好言歸去塵中事又生

豈潛弟平遠圖

卜築占寬閒修篁老樹間八窗開宇宙一室貯雲山野

曠行人少天遙去鳥還悠然會心處妙語徹玄關

謝趙山臺見訪

寂寞海東頭殷勤貴客舟如何經歲約祇作數宵留清
玩分行篋高吟壓小樓更須謀再會同醉菊花秋

臘前見蘭花

蘭叢纔一幹獨向臘前開托蔭偏宜竹先春不讓梅韻
從幽處見香自靜中來便欲紉芳佩靈均喚不回

次韻屏翁詠梅

芳信基花事東君思亦竒
橫枝踈蓓蕾半樹老丰姿
心共寒霜苦香唯夜月知
最憐清夢覺踈影竹窗時

次韻屏翁觀梅

晚寒籬落外一見一番新
喚覺羣芳夢先鍾萬古春
冷香宜醉寢真色任煙隣
更喜連朝雪飛花為辟塵

項宜父涉趣園

四面山迴合中間百畝畦
入門唯見竹遶屋半栽梅
果熟霜前樹魚肥雨後溪
秋來饒景物斟酌費詩材

小酌會芳分得陰字

暇日頻相顧清風舊竹林功名春後夢吟咏老來心世
事隨流水年芳付綠陰悠然千古意閒理斷紋琴

玉峰登眺得初字

玉峯竒絕處短策步崎嶇海近潮聲壯山空樹影踈吟
情危眺外飲興薄寒初數點新來雁高飛不羨渠

小樓扁山海圖鄭安道酒邊有詩因次韻

等閒成小集危眺豁幽情四面畫圖出一襟天地清晚

雲山曉靄夜月海空明自有茲樓景翰君第一評

次韻屏翁新元聚拜

履端來聚拜和氣洽昌辰蕃洽如今日栽培豈一人詩
書延澤潤忠厚續長春相祝無多語年新德又新

屏翁領諸孫小集亦龍弟野亭君玉即席有詩次

韻

結屋新亭好登臨雅興長心融八窗白塵隔九衢黃泛
菊金英碎嘗粳玉顆香更期梅著蕊來賞小春光

江濱晚霽

十里平沙路人行晚霽間水光涵遠樹雲影度空山吹浪江豚怒摩霄野鶴閒漁翁醉吹笛小艇泊前灣

池州

一城方九里宛在水中坻額揭顏公寺碑傳杜牧詩昔年稱上郡今日逼邊陲莫望長江北天寒風正悲

有永嘉薛君自號雲屋來池陽以詩見貽用韻答之

清晨聞剝啄喜得薛能詩風月一囊錦江湖兩鬢絲寒
城吹角夜孤館擁衾時誰會吟心苦梅花是舊知

有方叔材用余和薛雲屋韻見貽次韻奉酬

江湖前輩盡何敢易言詩鼠璞元非玉蛛羅不是絲池
塘生草處風雪跨驢時此是真吟境從來幾箇知

立春前五日得雪

雪作春前瑞銀城擁萬家太婆頭欲白九子頂先華壓
麥嘉培本封梅惜損花家童解人意燒鼎問烹茶

金陵懷古

尚聞深巷語烏衣無復高臺彩鳳儀棟宇半歌元帝廟
香煙爭奉誌公祠六朝興廢千年夢獨客登臨萬古悲
莫上鍾山望淮北西風禾黍更離離

自況

多貨徒作守錢奴伏臘無憂更有餘世路本夷何自險
人情太密反成踈非圖報施方為善豈為功名始讀書
門外良田堪種秫自牽黃犢試犁鉏

初遊方巖山

圖志舊嘗看紀載杖藜今得遍經行
漁翁化石幾年釣仙客有田何世畊
千尺枯崖蛻龍骨一簾飛瀑撼雷聲
相傳逸少曾來此惜不鐫巖記姓名

牡丹

萬巧千竒費剪裁瓊瑤錦繡簇成堆
世間妖女輪回魄天上仙姬降謫胎
笑臉倚風嬌欲語醉顏酣日困難擡
東君若使先春放羞殺羣花不敢開

喜有秋

去年已作填溝計誰料今年見有秋天意乘除元自定
人生伏臘漫多憂滿盃浙玉休論價成斛量金不計籌
最是野夫懽喜處春風百甕繞牀頭

次君玉弟聞新雁

霜風颯颯荻花洲避北趨南巧自謀倦翮飛殘千里月
寒聲催老一天秋乍教騷客驚詩夢莫為征夫寄別愁
汝度塞垣應未久新來烟燧已沈不

次韻東渠兄觀梅

詩眼非梅不可遮，三葩五蕊便堪嘉。
瘦如飯顆逢工部，老似磻溪卧子牙。
水影月香參衆妙，弟酌兄倡自成家。
快筭新醞同清賞，莫待枝頭爛漫花。

甘窮

自甘窮處更何疑，坎止流行信所之。
不學昌黎驅五鬼，肯隨子厚罵三尸。
堂堂白髮欺人出，耿耿青燈獨已知。
細嚼黃花香滿齒，清風千古一東籬。

送彭希聖姊夫赴三山民曹

槐笏綠衫初作吏要須立脚自廉勤
問閭疾苦宜加意
敷層竒羸莫與聞
少啖荔枝防美疾
多栽茉莉挹清芬
公餘覽徧佳山水倘有詩篇寄海雲

如京至西興阻風雨

月將圓夜出鄉關纔到西興月又殘
老去問名先已嬾
近來行路覺尤難
雲烟漠漠吳山暗
風雨瀟瀟浙水寒
識破人生真逆旅
此身何處不堪安

七夕感興二首

家家懽笑迓星期我輩相邀只酒卮
矯俗何須標犢鼻
甘愚不解候蛛絲
新秋光彩月來處
半夜清涼風起時
一曲玉簫塵外意
此音除是鶴仙知

相傳牛女起何時
無奈人間事
轉癡青鳥蟠桃方士信
金釵鈿合逆胡基
一杯記節圖成醉
萬感因秋却易悲
遺恨古今流不盡
銀潢耿耿接天池

次劉叔子總幹夜坐感秋韻

秋風遠客歎飄零滿鏡吳霜故故明酒盞論心踈舊約
詩筒到眼快新評短檠伴我夜深靜長笛何人月下橫
步遶空庭吟未竟隔林鸚鵡又傳更

代簡約諸同官探梅

信是搏沙放手開渴心空想細論杯等閒不見便逾月
如此相從能幾回舊雨已過重九菊新詩宜探小春梅
騎驢索句真顏面要向清溪洗出來

燒燈夕宋明府自置酒見招席上復賦詩因次韻

定詩盟并致別意

苦用吟心續祖燈得君印證愈分明一聆此日鷄窗話
盡洗前時蚓竅聲颺柳輕風寒忽暖催花小雨濕還晴
眼前總是詩光景可惜明朝又遠行

效宮詞體

楊柳萬絲堆怨緒丁香百結鎖愁腸小桃先得東皇寵
莫妬東風過海棠

讀陳元龍傳

九州四海沸如湯
問舍求田策最良
豪氣到頭成底事
未容欺客卧高牀

嚴子陵

赤伏君王訪舊遊
富春男子只羊裘
一竿本為逃名去
何意虛名上釣鉤

竹林避暑

自抱桃笙過竹林
濃陰一片直千金
清眠晝晚無人喚
時有風鳴石上琴

方岩山有仙人田頌宜父家其下于屋之西偏築
亭疏沼雜蒔花木為娛奉壽母之地即以名之自
著懷仙雜詠百有一首名勝留題亦多未免皆泥
乎神仙之說來徵余吟余謂神仙之事深言之則
似誕今諸賢所賦無復餘蘊使余更下注脚不愈
誕乎且人生一世苟能超然達觀惟適之安斯人
中之仙已豈必十洲三島間之謂哉因即此意賦

十章

築亭疏沼隔塵埃
白白朱朱次第栽
人面春風俱不老
板輿日日看花來

綠蘿翳翳結高林
烟吐霞吞一徑深
半夜松涼鶴先睡
滿山明月自橫琴

一澗寒泉九節菖
釀泉為酒冽仍香
玉卮捧處慈顏喜
眉壽方岩共久長

有時山洞拾荆薪
應過真仙對奕春
多少胷中高著處
儘教饒盡世間人

秋池清曉濯玄雲
鸚眼輝涵紫玉文
細字黃庭應寫就
莫將容易博鷲羣

桑竹森森遶屋邊
美池清泚浸良田
桃源只在桃溪上
不信壺中別有天

晚菘早韭各隨時
霜薤青青間露葵
甘脆日堪供小摘
不須他覓養神芝

紫錦囊緘五岳形
白書黑紙秘黃庭
何如琴几焚香坐
細讀包犧一卷經

自傍青牛種早秔炊來玉雪滿盆香休論服日餐霞事
只此延年第一方

阡陌縱橫尚宛然知他耕耨是何年果然絕粒能輕舉
底事仙人亦有田



兩宋名賢小集卷三百七十

欽定四庫全書

集部

兩宋名賢小集卷三百七十五

四

詳校官中書臣閔思毅

助教臣常循覆勘

總校官編修臣王燕緒

校對官編修臣王天祿

謄錄監生臣徐泰吉

欽定四庫全書

兩宋名賢小集卷三百七十一

宋 陳 思 編

元 陳世隆 補

圖詩

鄭思肖字憶翁號所南福州連江人太學上舍應博
學宏詞科元兵南下叩閣上太后幼主疏辭切直忤
當路不報遂客吳下寄食城南報國寺以終有錦錢

集一百二十四圖詩集咸淳集中興集

黃帝洞庭張樂圖

天水相涵萬象清
咸池真樂妙無垠
大音豈在九霄外
有意聽時却不聞

堯民擊壤圖

百姓相忘堯帝春
耕田鑿井淡無情
只今正是何年月
日日月月從東向生

巢父洗耳圖

萬事喧喧雜響中細參巢父意無窮
須還半掬溪邊水
方始教君耳不聾

許由棄瓢圖

天下搖頭不肯為
恰如瓢挂老松枝
許由不在箕山在
千古高風屬阿誰

呂望垂釣圖

八十老翁心尚孩
渭濱癡坐弄徘徊
當初若是逃名者
誰要文王上釣來

夷齊西山圖

扣馬癡心諫不休既拚一死百無憂因何留得首陽在
只說商家不說周

老子度關圖

紫氣東來壓萬山老聃吐舌笑開顏青牛車外天風闊
搖動當年函谷關

紀昌貫蝨悟射圖

從來絕藝欲超倫何止彎弓用意深覷破微塵微極處

忽開大地見紅心

鍾子期聽琴圖

一契高山流水心
形神空靜兩忘情
似非父母所生耳
聽見伯牙聲外聲

伯牙絕絃圖

終不求人更賞音
只當仰面看山林
一雙閒手無聊賴
滿地斜陽是此心

榮啓期三樂圖

生死悠悠付老天啓期三樂亦超然此身不得為男子
空活人間九十年

伯樂相馬圖

冀北羣中不可留如龍走地絕無儔何勞伯樂一相顧
抹過西風數百州

莊子夢蝴蝶圖

素來夢覺兩俱空開眼還如闔眼同蝶是莊周周是蝶
百花無口罵春風

輪扁諫讀書圖

輪扁釋椎開口諫國君據坐展書開古人糟粕終枯淡
誰醉天然滋味來

卞和泣玉圖

大璞中函天地精卞和抱出愈分明一番刖足一番哭
哭殺世人無眼睛

甯戚飯牛圖

斯人豈是飯牛者浩歎空懷扣角悲說到漫漫長夜處

南山白石也攢眉

孺子濯纓圖

秋影澄澄湛碧波濯纓人遠意如何臨風歌罷飄然去
賣弄滄浪清處多

葉公畫龍圖

神物難傳變化時葉公眼外泄天機一從親見真頭角
滿手風雲雷電飛

孟嘗君度闕圖

狐白裘邊事若難孟嘗門下亦何顏若無意智翻身去
半夜焉能度此關

屈原九歌圖

楚人念念愛清湘苦憶九歌頻斷腸只道此中皆楚國
還於何處拜東皇

屈原餐菊圖

誰念三閭久陸沉飽霜猶是傲秋深年年吞吐說不得
一見黃花一苦心

范蠡扁舟圖

烏喙無情奈若何
功成只合理漁蓑
躍身吳越興亡外
一舸江湖風月多

毛遂脫穎圖

十九人中不數君
當機勇辯獨超羣
若非末後脫穎出
爭得英風撥楚雲

魯歌罷圖

此心安分即逍遙
無欲何愁外境搖
纔有秋毫失中正

一杯水亦不能消

列子竊鈇圖

宇宙茫茫盡坦途莫將得失自相辜
胸中若有一些子天地山河俱竊鈇

秋胡子圖

郎歸猶未到家中艷語勾春妾面紅
巨耐相逢不相識梅花那肯戀東風

西施捧心圖

欽定四庫全書

蕩盡吳王醉後春化為顰笑艷精神當習一點痛得別
直是妖嬈惱殺人

驪山老姥磨鐵杵欲作繡針圖

欲化龜蛇生聖胎驪山微意孰能猜純鋼一塊都磨盡
不信纖毫眼不開

秦女吹簫圖

弄玉飄飄仙女姿鳳凰低舞久相期簫中應有別一曲
飛出青天影外吹

湘靈鼓瑟圖

霧質煙姿雪月心
凌波無跡似多情
試聽誰在湘江上
鬢鬢秋風曲數聲

毛女圖

六國傾城輦入秦
深花密柳鑠青春
神仙自有長生路
豈是阿房宮裏人

徐福採藥圖

仙藥長生不易求
仙山可在海東頭
祖龍滅盡諸侯後

徐福却來嬴一籌

青門種瓜圖

百二山河勢莫當
咸陽誰付與高皇
盡嫌嬴政鮑魚臭
爭慕邵平瓜圃香

漢高祖將韓信圖

先入關中得計多
彭城永是漢山河
不操擒縱英雄手
韓信何由肯倒戈

張子房遇黃石公圖

三度橋邊伺老仙始將兵法盡相傳不知躡足此一計
還出書中第幾篇

四皓圖

眈眈紫芝巖石隈避秦有地似蓬萊可憐白髮坐不定
又被漢朝呼出來

周亞夫細柳營圖

細柳營中作畧殊寧容直入驟先驅不因一見入門訣
文帝何曾識亞夫

李廣射石虎圖

怪石躡身艸莽中，錯疑猛虎噴腥風。
何消重費將軍力，只在當頭一箭功。

董仲舒不窺園圖

西漢諸儒君最醇，無人見面意應深。
三年盡力窺經史，一旦省花了古今。

蘇武牧羊假寐圖

十九年間墜渺茫，饑來齧雪齒生香。
一心只夢飛歸國。

雙眼何曾者見羊

蘇李泣別圖

同為武帝一時人忠逆分違感慨深
早信子卿歸漢去
淚痕滴滴黃金

司馬相如題柱圖

初上昇仙何慷慨重來衣錦頗從容
男兒意氣當如此
透過禹門方是龍

張騫乘槎圖

牛女宮中事若何親身曾得上天河逢人莫說支機石
漏泄蒼蒼意已多

翟公交情圖

翟公冷語久逾新漢世交情古亦今不被死生貧賤轉
此時方始見人心

朱買臣賣柴圖

年當五十始榮華覆水難收重嘆嗟豈信後來春色別
滿柴擔上盡開花

二疏東門祖帳圖

昔日賢哉二大夫東門祖帳耀通衢
太平時節獨先去
闔國人知此意無

嚴君平垂簾賣卜圖

多是垂簾自養神
僅能了日即安貧
不離忠孝談元妙
豈是尋常賣卜人

王初平牧羊圖

兄弟參商四十春
金華山裏問斜曛
相逢不是牧羊客

白石顛預冷笑君

西王母蟠桃宴圖

玄圃筵開物外春
萬仙歡笑動精神
蟠桃種子今猶在
誰是三千年後人

巖子陵垂釣圖

新莽紛紛未有涯
桐江山水頗為嘉
無心偶向一絲上
釣得清風滿漢家

袁安卧雪圖

飛玉堆寒二丈過杜門僵卧養天和
不愁屋外六花大
但覺胷中清氣多

高鳳讀書漂麥圖

癖愛詩書苦未休肯將俗事挂心頭
等閒痛快語言外
那見雨來知麥流

張天師飛昇圖

玉局曾經拜老君子孫今尚寶元文
要知龍虎山前意
但看空中數片雲

王粲覆碁圖

鴉鷺爭飛局局殊便生國手亦難圖未曾落子有一著
王粲還能覆得無

先主三顧州廬圖

抱膝高吟梁甫時卧龍致雨未為遲若無三顧州廬意
剖出心肝賣與誰

孔明出師表圖

一身英氣射光芒北定中原事轉長落得兩篇出師表

至今只是漢文章

孔明成都八陣圖

孔明抱義恥偏安
不道中興事業難
賴有石頭知落處
任從人換入門看

王祥剖冰圖

母病杯羹意未諧
解衣竟欲卧冰開
有心直透清波下
安得無魚躍出來

王衍舉阿堵物圖

口不言錢早不同何須相試苦相攻今朝叱去阿堵物
一室玲瓏分外空

竹林七賢圖

清談何補晉江山誰與中原了歲寒惟有白雲三四片
飛來自問古琅玕

王子猷看竹圖

秋沁微之骨亦清翠光如水漾空明只圖一見此君面
誰更問人問姓名

王子猷訪戴圖

雪夜懷人泛剡谿造門而返是還非不曾相見猶相見
滿載清風獨自歸

阮籍醉眠酒家圖

少婦當壚應怪人陶陶一覺了殘更無情不作如花想
夢見醉鄉生月明

劉伶荷鋤圖

酒國韶光無際涯大人境界絕朋儕生來自有一方地

何待醉終纔始埋

戴安道破琴圖

獨抱洋洋太古心
玉門何苦欲相尋
狂來寧可破琴去
不許俗人聞此音

畢卓甕間圖

醉玉頽來欲化仙
一窪和氣藹芳妍
終宵自向華胥去
吏部何曾甕下眠

孫康映雪讀書圖

孫康苦志惜居諸雪夜無燈興有餘冷地白光生破屋
自然開眼見詩書

張翰思蓴鱸圖

名爵雖榮心最苦蓴鱸有味食無厭後來京洛風塵暗
轉覺吳淞江水甜

孫楚枕流漱石圖

孫楚匆匆誤答時說來頗與事相違枕流漱石翻為妙
活弄甯中倒一機

庾亮登南樓圖

老子情懷頗滑稽登樓恰喜月明時雖然於此興不淺
且要諸人知不知

周處除三害圖

一朝周處奮英豪三害皆除豈憚勞若是不能降自己
縱屠龍虎不為高

王羲之蘭亭圖

猶記蘭亭三月三流觴曲水暢情酣分明一段永和意

好向羲之筆外參

桓伊三弄圖

傾蓋相逢不問誰知音那肯露心機一聲吹破清秋影
驚散閒雲各自飛

車武子聚螢讀書圖

武子耽書不暫忘練囊終夜照淒涼讀來讀去東方白
笑殺流螢數點光

陸績懷橘遺母圖

獨薦霜丸意不安誰供甘旨侍團欒
萬樹黃金盡喜歡
萬樹黃金盡喜歡

吳隱之飲貪泉圖

外物終難換肺腸隱之清介頓生狂
便教飲盡貪泉水
只覺通身白雪香

郝隆曬腹書圖

七夕庭中羅綺乾鄰家應是鄙儒冠
文章滿腹無人識
鋪與青天白日看

陶淵明三逕圖

老氣蒼寒松樹活閒情幽淡菊花開一條古路無人走
還且與誰相往來

陶淵明對菊圖

彭澤歸來老歲華東籬儘可了生涯誰知秋意凋零後
最耐風霜有此花

王孝伯痛飲讀離騷圖

名士天生磊落才只耽痛飲罄樽壘誰傳一味解醒法

歌斷離騷眼自開

許真君飛昇圖

鐵柱遺蹤尚儼然
五陵後必出羣仙
當時謔姆說甚麼
四十二人都上天

孫登長嘯圖

碧眼空空照九州
阮公不是我同流
劃然長嘯誰聽得
獨有蘇門山點頭

王烈餐石髓圖

五百年方開此山寒光浮暖濕而乾明明正是洪濛髓
只恐凡人不肯餐

桃源圖

長城徭役苦咨澧水偷春隱歲華有耳不聞秦漢事
眼前日日賞桃花

爛柯圖

日出樵柴日落歸幾年黑白夢紛飛看來直待斧柯爛
始悟老仙碁外機

延平躍劍圖

白晝平津湧似雷
盡驚靈物出塵埃
倒翻三尺揮空去
對舞雙龍破浪來

陶弘景三層樓聽松風圖

弘景岑樓挿太清
萬龍捲翠響泠泠
此心不出三界看
一片秋聲何處聽

文選閣圖

太子奢華能幾年
盡將春夢付荒煙
錯聽古調一兩拍

空嗅斯文數百篇

唐明皇游月宮圖

玉仗飛行馭太空
須臾徑到廣寒宮
三郎曾次無高見
落眼蟾蜍光影中

李靖天瓢圖

夢裏騎龍出八荒
埽空熱惱作清涼
不消數滴天瓢雨
洗盡娑婆透骨香

王勃滕王閣記圖

王勃清才俊不禁
爛鋪艷錦賞知音
空餘高閣青雲裏
誰識落霞秋水心

狄仁傑白雲親舍圖

駐馬回頭眺碧空
河陽在望去匆匆
吾親雖舍白雲下
豈出梁公一念中

孟浩然歸隱圖

明主憐才若賜官
奔馳微祿負家山
狂吟一首笑歸去
滿路秋光上醉顏

李太白硯靴圖

斗酒未乾詩百篇篇篇奇氣走雲煙自從捧硯脫靴後
笑看唐家萬里天

杜子美茅屋為秋風所破歌圖

雨捲風掀地欲沉浣花溪路似難尋數間茅屋苦饒舌
說殺少陵憂國心

杜子美騎驢圖

飯顆山前花正妍飲愁為醉弄吟顛突然騎過艸堂去

夢拜杜鵑聲外天

子美孔明廟古柏行圖

諸葛甘棠歲月深
霜皮黛色鬱沉沉
尚垂清蔭蜀國裏
一樹風霜千載心

韓昌黎祭鰐魚圖

朝奏空言暮遠途
藍關飛雪漬衣裾
豈期去國八千里
此意猶能化鰐魚

柳子厚賦寒江釣雪圖

空玄影外渺孤舟不與漁翁意思侔萬頃風濤一天雪
且看誰解下金鈎

盧仝煎茶圖

月團片片吐蒼烟破帽籠頭手自煎七椀不妨都喫了
恣開笑口罵羣仙

陸龜蒙茶竈筆牀圖

笠澤往來無定期煮茶垂釣醉吟詩一船清致終難畫
不是散人應不知

公孫大娘舞劍圖

纖手生風攪畫寒
好花翻影艷清歡
試看不犯鋒鋌處
舞碎晴空雪一團

張果老倒騎驢圖

云是堯時丙子生
狂蹤怪跡恣幽情
拗驢面目不須看
一任騎來顛倒行

張志和漁父圖

茗雪春深花滿谿
一鈎翻動碧琉璃
蓑衣箬笠儘有意

不到斜風細雨知

藍采和踏踏歌圖

踏踏歌中天地開
紅顏春樹莫相催
藍袍轉破轉奇特
別看仙人舞一回

鍾呂傳道圖

鍾呂喃喃手指空
應談玄牝妙無窮
都來造化只半句
不在丹經文字中

呂洞賓賣墨圖

鍊就玄玄一塊金
朝磨暮寫愈精神
先生此墨初無價
不識誰為買墨人

沈東老遇呂洞賓圖

東老忘懷相遇時
洞賓爛醉以為期
聊題不涉毫端句
早被石榴皮得知

巴山橘中圖

剖破渾淪一殼寬
二仙飛去已雲端
須知橘裏封疆別
莫作凡間勝負看

中秋苦雨趙知微登天柱峯賞月圖

人愛中秋月色同忽驚涼雨翳昏鐘如何只隔一重幙
不見仙家天柱峯

南柯蟻夢圖

忘了堂堂六尺身
鬼花生艷幻微春
絕憐蟻窟無分曉
迷盡古今多少人

崔護覓水圖

哭斷東風轉有情
俄驚滿面笑容新
當時飲水今猶醉

別是桃花半點春

倩女離魂圖

有心誰怕鐵為墻
直透虛空未易量
若問合離真偽事
滿池綠水笑鴛鴦

崔智韜虎妻圖

佳人睡覺失青山
惡毒心腸賣笑顏
認得皮毛一歸去
花枝無艷虎全斑

玉川長鬚赤脚圖

慣立煎茶屋角頭
低眸頻候雪花浮
一奴一婢亦作怪
不為先生破屋愁

陳搏睡圖

五季干戈亂似麻
慵將醒眼閱年華
齁齁一覺華山裏
誰問春開幾度花

逋仙探梅圖

雪壓咸平處士家
凍雲鎖暝苦相遮
欲知天上春消息
只覓南枝第一花

欽定四庫全書

兩宋名賢小集
卷三百七十一

三十一

蘓東坡前赤壁賦圖

泛舟赤壁痛銜盃孟德英豪安在哉何似江山風月妙
不從自己外邊來

李伯時所畫太一真人蓮葉舟圖

天上真人妙出神聊乘蓮葉下南冥若人欲識空涼境
但誦薰風一卷經

無名氏巡簷數修竹圖

四簷玉立碧重重終日相看眼亦空何啻數來千萬箇

不知那箇弄清風

欽定四庫全書

兩宋名賢小集卷三十一

兩宋名賢小集卷三十一

欽定四庫全書

兩宋名賢小集卷三百七十二

宋 陳思 編

元 陳世隆 補

月洞吟

王鉉字介翁括蒼人曾為縣尉元兵陷臨安棄印綬
歸隱湖山與尹綠坡虞君集葉招山諸人結社賦詩
題所居曰月洞孤迥絕塵有桃源栗里之致焉遺詩

一卷曰月洞吟

別虞君集

瓦瓶擔酒去送客石橋東潮過汀沙上船迴島嶼中
桃花三月雨楊柳五更風明日思君處渡頭煙水空

送默然上人歸天台

孤雲不定心持鉢度寒林野飯青蒲潔客程黃葉深
海風潮水發山雨燒烟沈歸到石橋日應看瀑布吟

錢塘江

涼踈萬柳條秋滿石欄橋吳越興亡事晨昏來去潮雲
開天日近水接海山遙望到西陵渡風帆穩自飄

塞上曲

黃雲連白艸萬里有無間霜冷鬪髡哭天寒甲冑閒馬
嘶經戰地鷗認打圍山移戍腰金印將軍度玉關

買舟

赤欄橋上路幾度卜歸期流水無迴日行人有老時潮
來江勢逆月出海門遲風順輕舟駛蒲帆盡夜吹

早行

客程因太早却費一更眠落月已歸海殘星猶在天櫓
聲荷葉浦螢火豈花田隅岸誰家起青燈遠樹邊

別黃吟隱

飲乾分別酒話久未移舟潮水催行客海山生遠愁蟬
聲秋浦樹鴈影夕陽樓今夜相思夢蘆花第幾洲

秋深

風露損衣裙秋深懷故廬僕方談夜夢客至得家書子

黑石蓮老柿紅霜葉踈今年籬下菊遙憶少人鋤

訪翟梅山

諸老彫零盡江湖今有誰半生行客慣多難識君遲花
屋春風酒梅山雪夜詩莫為名釣出世事正如棋

晚春即事

雲氣不明天陰忽又晴喜涼溪鵲浴知雨樹鳩鳴仙
藥黃精飯齋蔬白榘羨惜春吟未就閒踏落花行

山中

榮枯皆定數枉作送窮吟有色非真畫無絃是古琴青
松秦世事黃菊晉人心塵外烟蘿客相尋入遠林

避亂柯巖綠坡諸公以詩見寄

柯枯地西東音書久不通山河隔今古天地老英雄局
敗棋難著愁多酒易中花前多少恨無語寄春風

感秋寄白雲趙寺丞

囊裏不藏金相隨只破琴每因看月夜長動故人心敗
艸關河路秋風楚越砧愁來不成寐壞壁更蛩吟

谿村

水路隨山轉谿晴踏軟沙斜陽曬魚網疎竹露人家行
蟹上枯岸饑禽銜落花老翁分石坐閒話到桑麻

寄友

髮影明寒鏡蕭蕭亦自憐故人難會面行客又經年晴
雪添崖瀑春雲雜燒烟相思有書札寫盡夜燈前

寄杜北山

倦客蕭蕭兩鬢秋柳絲無力絆歸舟曉風落葉辭高樹

夜月行人在別州千里關河鄉國夢一江煙浪古今愁
鴈聲過盡青天濶却憶同登望海樓

暮春寄僊洲舍弟

去年妍菊醉重陽今日誰知各異鄉
落葉石欄霜信早敗荷池館雨聲涼
人情好惡花甘苦世事榮枯艸短長
別有駿鷗雙翮健剛風摩透入蒼茫

宿香巖院

地爐煨火柏枝香借宿寒寮到上方
山近白雲歸古殿

風高黃葉響空廊
敲門僧踏梅花月
入夜猿啼楓樹霜
夢醒不知窗日上
時聞清磬出松堂

古杭感事

國事凋零王氣衰
東南豪傑竟何之
雲寒廢殿排班石
艸卧前朝記事碑
沙漲浙江龍去遠
天寬北闕鳳歸遲
可憐不老吳山月
曾照官家寵幸時

山居

屋頭蘚樹蛻鳴蛩
池上溝泉鑿石通
香老蒲花春洞影

涼生柵葉午窗風泥瓶開酒留樵客
窮笠穿雲訪藥翁
雖是一貧清似水定無徭役到山中

金陵感秋

魚書難寄水空流兩袖西風破黑裘
客夢蘆花晉城月
歸心楓葉浙山秋世情老去諳方熟
愁事來時醉便休
滿目關河懷古恨如今何處問孫劉

湖山卽景次尹綠坡

湖山掩映鴈潭秋今古詩人說勝遊
綠柳影分騎馬路

丹楓葉落釣魚舟前坡風送歸樵笛別墅雲藏賣酒樓
長記尋梅冰雪裏氍毹靴駝帽鷓鴣裘

尹綠坡山間吟所

苔痕分路見人家犬護籬根卧落花一片林塘詩境界
四時花葉隱生涯鋤山揀日春栽藥汲水和雲夜煮茶
耕錄有文須點看旋搖松露入硃砂

寓龍虎山中示張鍊師

蓮盃送別萬峯雲龍虎山前過小春艸屢慣穿枯嶺葉

布衣猶帶舊京塵，
燼寒不見遊仙夢。
路遠誰憐，倦客貧。
東望海門歸未得，
北風吹雪滿唐巾。

春酌

酒闌歌罷翠簾遮，
月柳驚啼子夜鴉。
多少斷雲心上事，
結成香夢是梨花。

西湖

南北高峰叫杜鵑，
斜陽浮翠斷橋邊。
畫船歸盡江湖夢，
一半樓臺楊柳煙。

怯暖

怯暖新裁白苧衣
棋聲深院客來稀
春風無力晴絲軟
絆住楊花不肯飛

秦望山

祖龍癡欲望長年
却遣君房渡海船
枉去蓬山覓丹藥
桃源亦自有神仙

深春二首

夾泥花上燕巢邊
翠箔桑空蠶又眠
天氣乍晴風候別

坐看盆藕出雙錢

燕子來時春又休
暖風吹綠上枝頭
繡簾不隔荼蘼月
香影無人自入樓

采蓮曲

羅袂濺濕鬢雲偏
搖落香風滿畫船
忽憶年來顛顛夢
鴛鴦正在藕花邊

春閨辭

桃吹紅雪上簾鉤
楊柳風絲拂畫樓
日透欄干人病酒

賣花聲過懶梳頭

芳庭植上人

苔侵坐處石頭青
滿屋春雲不用扃
入定醒來香印冷
一簾花雨濕殘經

喜涼

吹笛何人在小樓
夜深不下玉簾鉤
涼風敲落梧桐葉
片片飛來盡是秋

宿西上竺

閒收石上著殘棋
山月無聲鶴睡時
落葉打窗霜滿屋
有僧吟得夜寒詩

水居

飛鷗貼水水連天
一半青山半是烟
日暮潮迴漁父醉
不知船閣淺沙邊

斷橋春望

拾翠車閒輦路塵
山南山北杜鵑春
誰家庭院東風裏
吹出桃花不見人

湖上晚望

酒醒湖光生嫩涼
卧船吹笛藕花香
遊人盡逐鶯花去
一片閒情在夕陽

漁父吟

竹絲籃裏白魚肥
日落江頭換酒歸
只恐明朝風雪凍
老妻連夜補蓑衣

壽光宮

井氣蒸雲濕石欄
虬鬚道士自燒丹
開門風帶琴聲出

一陣松花滿醮壇

裁衣曲

燒罷心香午夜闌
玉纖輕捻剪刀寒
衣成恐不如郎意
獨試燈前照影看

花下作字付葉柘山使者

花蘚層層潤石牀
綠陰多處自生涼
閒將筆染茶蘼露
寫得春辭滿紙香

燈花

喜信今宵報與誰
玉人曾剪畫雙眉
等閒開落銀缸見
只閉春風不得知

月洞書屋

自寫自詩粘壁上
何須古畫與名碑
隔牆風落閒花片
日日飛來入硯池

病中

鏡裏初疑看不真
衰顏只恐是他人
醫言斷酒方除病
母戒觀書亦損神
卧久不知黃葉落
起來添出白髭新

自梳頭髮斜陽下手脫隨風半委塵

兩宋名賢小集卷三百七十二

欽定四庫全書

兩宋名賢小集卷三百七十三

宋 陳 思 編

元 陳世隆 補

怡雲軒詩集

姚孝錫字仲純豐縣人政和四年登進士調代州兵曹元兵入鴈門州將議以城降官屬投死無所孝錫卧牀大斲畧不為意旋以疾去官時年二十九家五

臺善治生亭榭竹木奄有遊觀之勝賓客日盈其門
州境歲饑出家所藏粟以賑貧乏鄉人德之中年後
以家事付諸子放情山水詩酒娛樂自號曰醉軒年
八十三乃終

閒居

無客訪衰殘柴門盡日關耽書真是癖惜酒近成慳苔
徑行搜句茅檐卧看山却嫌明鏡裏偏照鬢毛斑

次韻秋興

老畏年光速愁添旅夢多西風著梧竹歸思入煙波夜
永憑詩遣顏衰得酒和故溪千樹柳誰復曬魚蓑

謁滕茂實祠

本朝蘇鄭共揚驪不意芝蘭失後凋遺老祇今猶涕淚
後生無復識風標西陘雁度霜前塞潯水樵爭日暮橋
追想平生英偉魄凌雲一嘆豈能招

次韻王無兢見寄

客懷重寄仲宣樓白草黃雲塞上秋山色不隨塵世改

水聲還抱故城流，隙中畏境都堪玩。
鏡裏衰顏祇自羞，多愧詩人苦相憶。
遠傳佳句弔清愁。

感白髮

彈鋏憑誰聽，客歌震雷那復化。
魚梭梳頭白雪驚，新有障眼玄花比舊多。
鄉間阻兵猶隔絕，羈懷憑酒暫消磨。
不須更問今朝客，門外原無雀可羅。

溪橋早春

輕黃未染柳梢勻，連日溪風捲塞塵。
乍暖乍寒花信晚。

相呼相喚鳥聲頻
少勤漫挾經綸策
老懶空餘病患身
追憶故園桃李樹
年年紅紫為誰新

登樓有懷

老愧憑欄目力昏
百年懷抱向誰論
晴空雁起雲邊塞
夕照人歸郭外村
因憶昔遊驚迅晷
暫將離恨付清樽
誰人肯似邊居士
遠駕朱輪過雀門

歲晚懷舍弟

少易成歡老易傷
壯遊垂白未還鄉
煙塵無復音書到

魂夢猶疲道路長
爆竹又驚新薦歲
屠蘓空憶舊傳觴
年年此日遙相憶
鴻雁何時續斷腸

題柳溪別墅

雨霽風和不動塵
柳邊攜酒賞晴春
頻來溪鳥渾相識
度水穿花不避人

兩宋名賢小集卷三百七十三